



Газет 1930 жылдың 10 қазанынан шыға бастады

Ұлттық банк теңге-доллар саудасының регламентін өзгертті

Қазақстан Ұлттық банкі «Қазақстан қор биржасы» АҚ-мен бірлесіп, 9 наурызда «теңге – АҚШ доллары» валюта жұбы бойынша сауда-саттық регламентін өзгерту туралы шешім қабылдады, деп хабарлайды Egemen.kz Ұлттық банкке сілтеме жасап.

Оған сәйкес, «теңге–АҚШ доллары» валюта жұбы бойынша сауда-саттық 9 наурыз күні Нұр-Сұлтан қаласының уақыты бойынша сағат 15:00-де ашылды және Франкфурт аукционы форматында жүргізілді.

«Бұл шешім жоғары құбылмалылық аясында валюта нарығының тұрақсыздануына және сыртқы факторлар тарапынан қысым жасауға жол бермеу мақсатында қабылданды.

«Теңге – АҚШ доллары» валюта жұбы бойынша сауда-саттықтың бұдан былайғы режимі туралы ақпарат ресми байланыс жасау арналары арқылы уақтылы жеткізілетін болады», делінген ҰБ ақпаратында.

«Егемен Қазақстан» газетінен.

Нашар интернет үшін операторларға айыппұл көбейеді

Мәжіліс депутаттары Қазақстанның әкімшілік құқық бұзушылық туралы Кодексіне байланыс мәселелері бойынша түзетулерді бірінші оқылымда мақұлдады, деп хабарлайды Egemen.kz.



Мәжілістің Заңнама және сот-құқықтық реформа комитетінің мүшесі Жанна Телпекбаеваның айтуынша, пандемия және халықтың қашықтан жұмыс режиміне көшуі кезеңінде көрсетілетін байланыс қызметтері сапасының маңыздылығы артты. Ол азаматтардан интернет сапасына көбірек шағым түсетінін атап өтті.

Мәселен, Әкімшілік құқық бұзушылық туралы кодекстің 637-бабы бойынша ірі кәсіпкерлік субъектілері үшін нашар қызмет көрсеткені үшін 100 АЕК, ал бір жыл ішінде қайталап бұзғаны үшін 200 АЕК-ті құрайды.

«Бұл ретте ірі кәсіпкерлік субъектісі бұзушылық фактісін таныған кезде 50%, яғни 50 немесе 100 АЕК мөлшерінде айыппұл төлеуге міндетті. Көбінесе операторлар қосымша жабдықты орнатудан гөрі айыппұлдың жартысын төлеу ыңғайын табады. Сайып келгенде, байланыстағы барлық қолайсыздықтар оператор алдындағы өз

міндеттемелерін тұрақты негізде орындайтын, яғни тарифті толық көлемде төлейтін абоненттерге әсер етеді», деді комитет мүшесі.

Депутат заң жобасы операторлардың техникалық параметрлерге сәйкес келмейтін байланыс қызметтері мен интернетке қолжетімділік үшін жауапкершілігін күшейтуге мүмкіндік беретінін атап өтті.

«Көрсетілген құқық бұзушылық үшін әкімшілік айыппұлды 1000 АЕК-ке дейін (3 063 000 теңге) және бір жыл ішінде қайталап жасалған бұзушылық үшін-1500 АЕК-ке дейін (4 594 500 теңге) арттыру азаматтардың сапалы байланыс және интернет қызметтерін алу құқығын қорғауға, операторлар арасында бәсекелестік үшін қосымша жағдайлар жасауға мүмкіндік береді», деп қосты Жанна Телпекбаева.

«Егемен Қазақстан» газетінен.



Президент әкімдердің халықпен кездесулерін өткізу туралы Жарлыққа қол қойды

Мемлекет басшысы әкімдердің халықпен кездесулерін өткізу туралы Жарлыққа қол қойды, деп хабарлайды Ақорданың ресми сайты. Назарларыңызға жарлықтың толық мәтінін ұсынамыз. «Қазақстан Республикасының Президенті туралы» Қазақстан Республикасы Конституциялық заңының 17 және 21-баптарына сәйкес және қоғамды одан әрі демократияландыру, елде жүргізіліп жатқан реформалар туралы халықты хабардар ету, жергілікті атқарушы органдардың ашықтығын, жауапкершілігін, есептілігін арттыру мақсатында ҚАУЛЫ ЕТЕМІН:

1. Барлық деңгейдегі әкімдер жыл бойы халықпен кездесулер өткізсін, олардың барысында халықты толғандыратын әлеуметтік мәселелерге баса назар аударып, Қазақстанды жаңғыртудың жаңа бағдарының негізгі бағыттары туралы хабардар етсін және проблемалық мәселелерді шешудің жолдары мен мерзімдерін түсіндірсін.

2. Облыстардың, республикалық маңызы бар қалалардың, астананың әкімдері:

1) жыл сайын 15 қаңтарға дейін мыналарды: жарты жылда бір рет облыс әкімінің әр ауданда және облыстық маңызы бар әр қалада кемінде бір көшпелі кездесуін; республикалық маңызы бар қала, астана әкімінің қаланың әр ауданында тоқсан сайын кемінде бір көшпелі кездесуін; аудан әкімінің әр ауылда, кентте, ауылдық округте, аудандық маңызы бар қалада тоқсан сайын кемінде бір көшпелі кездесуін; облыстық және аудандық маңызы бар қала, ауылдық округ әкімінің қаланың, ауылдық округтің құрамына кіретін әр ауданда (шағын ауданда), ауылда, кентте тоқсан сайын кемінде бір көшпелі кездесуін; ауыл, кент, қаладағы аудан әкімінің тоқсан сайын кемінде бір кездесуін өткізу көзделген әкімдердің халықпен кездесулерінің икемді жылдық күнтізбесін (бұдан әрі – күнтізбе) әзірлеп, оны мәслихатпен келісу бойынша бекітіп отырсын. Қажет болған жағдайда күнтізбені мәслихатпен келісу бойынша түзетуге жол беріледі; 2) жыл сайын 20 қаңтарға дейін Қазақстан Республикасының

Үкіметіне бекітілген күнтізбені ұсынсын.

3. Барлық деңгейдегі әкімдер: 1) халықтың талап етуі бойынша және қажет болған кезде күнтізбеден тыс халықпен кездесу өткізсін; 2) техникалық мүмкіндіктерді ескере отырып, халықтың әлеуметтік желілердегі ресми аккаунттарда міндетті түрде пікір білдіру мүмкіндігімен онлайн-трансляциялар, сондай-ақ қажет болған жағдайда бейне конференц байланыс ұйымдастыру арқылы кездесулер өткізуді қамтамасыз етсін; 3) кездесу үшін жоспарланған уақыттың төрттен бірден аспайтын бөлігін баяндаманы таныстырумен, уақыттың қалған бөлігін «сұрақ-жауап» форматында өткізсін;

4) халықпен кездесулер өткізгенге дейін: проблемалық мәселелердің пулын жасау үшін жергілікті қоғамдастық жиналысы және қоғамдық кеңестер мүшелерінің қатысуымен халықтың сұраулары мен ұсыныстарын жинау жөнінде комиссия құруды; ашық деректердің интернет-порталына және әкімдердің блог-платформасына, сондай-ақ коммуникацияның басқа да нысандарында халықтан келіп түскен сұраулар мен ұсыныстарды жинауды және талдауды; бұқаралық ақпарат құралдарында, оның ішінде өңірлік баспа басылымдарында, радиода, ресми интернет-ресурстарда және «электрондық үкімет» веб-порталында, ашық деректер интернет-порталында, сондай-ақ әкімдіктердің (әкімдер аппараттарының) ресми аккаунттарында, әлеуметтік желілерде және барлығына қол жетімді жерлерде ақпараттық-насихат жұмысын жүргізуді; әкімнің халықпен кездесуін өткізу туралы хабарландыруды: облыс, республикалық маңызы бар қала және астана, аудан, облыстық және аудандық маңызы бар қала әкімі өткізетін кездесу күніне дейін екі апта бұрын; ауыл, кент, ауылдық округ, қаладағы аудан әкімі өткізетін кездесу күніне дейін бір апта бұрын ұйымдастыруды қамтамасыз етсін;

5) халықпен кездесулер өткізгеннен кейін: жергілікті атқарушы органдардың, прокуратура және ішкі істер органдарының басшы-

лық құрамымен, мәслихат депутаттарымен, қоғамдық кеңестер мүшелерімен, жергілікті зиялылар мен бірлесіп, азаматтарды жеке қабылдауды өткізсін; проблемалық мәселелерді қаржыландыру мүмкіндігін мәслихат сессиясында қарай отырып, жүйеге келтірсін; кездесулер мен азаматтарды қабылдау аяқталған күннен бастап күнтізбелік он күннен кешіктірмей, өткізілген кездесулердің қорытындылары туралы ақпаратты, проблемалық мәселелердің тізбесін, проблемалық мәселелерді шешудің нақты мерзімдерін, жауапты орындаушыларды көрсете отырып, оларды шешу жөніндегі іс-қимыл жоспарын бұқаралық

ақпарат құралдарында, оның ішінде ресми интернет-ресурстарда және «электрондық үкімет» веб-порталында орналастыруды қамтамасыз етсін; тоқсан сайын есепті кезеңнен кейінгі айдың 25-күніне қарай кездесулерде халық көтерген проблемалық мәселелерді шешу барысы туралы ақпаратты ресми интернет-ресурстарда және «электрондық үкімет» веб-порталында орналастырсын. 4. Әкімдіктер мен әкімдер аппараттары кездесулерге мүдделі тұлғалардың ауқымды аудиториясын, оның ішінде мәслихат депутаттары, партиялар, қоғамдық ұйымдар мен оппозиция өкілдерін тартсын. 5. Қазақстан Республикасының Үкіметі: 1) жыл сайын есепті жылдан кейінгі 1 ақпанға дейін өңірлердің бекітілген күнтізбелерін Қазақстан Республикасы Президентінің Әкімшілігіне ұсынуды; 2) жыл сайын есепті жылдан кейінгі жылдың 15 ақпанына және 15 тамызына дейін орталық атқарушы органдар, ұлттық холдингтер мен компаниялар деңгейінде шешуді талап ететін проблемалық мәселелердің тізбесін және оларды шешу жөніндегі ұсыныстарды жинауды; 3) әкімдердің халықпен көшпелі кездесулерінің қорытындысы бойынша халық көтерген мәселелерді шешу жолдары мен олардың орындалу барысын көрсете отырып, олардың ішінен құзыретіне кіретін проблемалық мәселелердің тізбесін орталық атқарушы органдардың, ұлттық холдингтердің, компаниялардың ресми интернет-ресурстарында орналастыруды және тоқсан сайын жаңартуды қамтамасыз етсін. 6. Осы Жарлыққа қосымшаға сәйкес Қазақстан Республикасы Президентінің кейбір жарлықтарының күші жойылды деп танылсын. 7. Осы Жарлықтың орындалуын бақылау Қазақстан Республикасы Президентінің Әкімшілігіне жүктелсін. 8. Осы Жарлық алғашқы ресми жарияланған күнінен бастап қолданысқа енгізіледі.

Қазақстан Республикасының Президенті Қ.Тоқаев. Нұр-Сұлтан, Ақорда, 2022 жылғы 3 наурыз.

«ПАРАСАТ» ПІКІРТАЛАС КЛУБЫНЫҢ АЛҒАШҚЫ ОТЫРЫСЫ ӨТТІ



Шолаққорған ауылының Мәдениет үйінде «АМАНАТ» партиясының аудандық филиалы жанынан құрылған «Парасат» пікірталас клубының алғашқы жиыны өтті. Аудан әкімі Мұхит Тұрысбековтің қатысуымен өткен шараға аудандық мәслихат

хатшысы Бегімбет Байғараев, ауыл мен округ әкімдері, клуб мүшелері, белсенді азаматтар мен жастар, БАҚ өкілдері қатысты.

Басқосу барысында өңір басшысы Мұхит Тұрысбеков көктемгі дала жұмыстары және көгалдандыру, ауыз су,

табиғи газ, ауыл шаруашылығы мен кәсіпкерлік саласындағы өзекті мәселелерді клуб мүшелерімен талқыға салды. Сонымен қатар жиында қоғам белсенділері жергілікті бюджет, жол, өндіріс орындарындағы мәселелер, жұмыссыздықпен күрес мәселелерін көтерді. Белсенділердің ұсыныстарын тыңдаған аудан басшысы мәселелердің шешілуі жолында тізе қосып еңбек етуге шақырды.

«Парасат» пікірталас клубының келесі отырысы көктемгі дала жұмыстары мен елді мекендерді көгалдандыруға арналып, Шолаққорған ауылында өтетін болып белгіленді.

«Созақ үні»-ақпарат.



Мерекелік гүл шоқтарын ұсынды

8 наурыз – Халықаралық әйелдер күніне орай аудан әкімі Мұхит Тұрысбеков 100 жастан асқан ел аналарын арнайы барып құттықтады. Қарақұр ауылында тұратын 102 жастағы Сырғакүл Керімбекова мен Сызған ауылында тұратын 103 жасқа толған Дүйшет Қалаубаеваларды мерейлі мерекемен құттықтап, иықтарына орамал жауып, сый-сияпат жасады. Мерекелік гүл шоқтарын ұсынды.

«Гасыр жасап, өмірдің ащы-тұщысын көрген әжелеріміздің өмірі баршамызға үлгі. Бұл кісілер елдің анасы. Сіздердей аналардың бата тілегі ұрпаққа күш-қуат береді. Елдің амандығын жұртың тыныштығын тілеп, аман

жүріңіздер!»,-деп құттықтады аудан басшысы.

Айта кетерлігі, 1920 жылы Созақ ауылында дүниеге келген Сырғакүл Керімбекова әженің кіндігінен 4 ұл, 1 қыз тарап, бүгінде 15 немере 25 шөбере, 7 шөпшек көріп отыр. Колхозда жұмысшы, сақпаншы болып ауыр жұмыс істеген. Созақ, Қаратау совхозында есепші болған. Саналы ғұмырын еңбек жолына арнаған аяулы жан. Ал сызғандық Дүйшет Қалаубаева әжемиз биыл 103 жасқа толды. Тыл және еңбек ардагері. «Асыл әже» медалін кеудесіне таққан. Ел анасы 3 қыз 2 ұлдың анасы. Бүгінде немере, шөбере, шөпшек көріп отыр.

«Созақ үні»-ақпарат.

Іскер әйелдерге лайықты құрмет

Аудан әкімі Мұхит Тұрысбеков, Халықаралық әйелдер күні мерекесі қарсаңында, ауданның дамуына үлес қосып, түрлі салада қызмет етіп жүрген іскер әйелдер қауымын қабылдады.

-Осында отырған бәріңіз түрлі салаларда қажырлы еңбек ете жүріп, «Бақ-Нұр» іскер әйелдер қоғамдық бірлестігі аясында бірігіп, игі істердің ұйытқысы болып келесіздер.

Бегімбет Байғараев, аудандық ардагерлер кеңесінің төрағасы Қабылбек Еспенбетов қатысып, мерекелік жылы лебізін білдірді. Түркістан облысы іскер әйелдер Ассоциация төрайымы Инара Намазбаева ыстық тілегін жеткізіп, аудан көлемінде игі істің ұйытқысы болып жүрген, кәсіпкер Бибімәриам Тұрмахановаға Іскер әйелдер қауымдастығының «Еңбегі жанған арулар» медалін табыс етті.



Мемлекетіміздің, ауданымыздың дамуына зор үлес қосып, қоғамның ісіне бей-жай қарамайсыздар, - деген аудан басшысы Мұхит Сексенбайұлы жүрекжарды тілегін білдірді. Сондай-ақ іскер әйелдерге аудан әкімінің алғыс хатын тапсырып, мерекелік сый-сияпат жасады.

Қабылдауда аудандық мәслихат хатшысы

Аудандық «Бақ-Нұр» іскер әйелдер қоғамдық бірлестігінің төрайымы Нұржамал Майусова, алда атқарар жоба жоспарларымен бөлісті. «Демеу» мүгедектер қоғамы» қоғамдық бірлестігінің төрайымы Бақыт Смахова, еңбек адамы Нұржамал Төлеуова құттықтау сөз сөйледі.

«Созақ үні»-ақпарат.

МЕРЕКЕЛІК ШАРА ӨТТІ



Халықаралық әйелдер мерекесі қарсаңында Сұлтанбек Қожанов атындағы тарихи өлкетану музейінде аудандық әйелдер кеңесінің ұйымдастыруымен «Аналар өмір шуағы» атты мерекелік шара өтті. Шара аясында республикаға танымал қылқалам

шебері, Теріскей өңірінің таланты суретшісі Ақмарал Байғараеваның «Ару. Ана. Әлем» атты көрмесі ұйымдастырылды. Әйел затының өмірінен сыр шертетін көрмеге мазмұны терең туындылар қойылды. Шараға келушілер көрмені жоғары бағалады.

Сондай-ақ, шараға қатысқан аудан әкімі Мұхит Тұрысбеков құттықтау сөз сөйлеп мерекенің мән-маңызына, әйел азаматтардың қоғамдағы роліне тоқталды. Белсенді қызмет атқарып жүрген әйел азаматтарға, алғыс хат табыс етті. Аудандық мәслихат хатшысы Бегімбет Байғараев мерекелік лебізін білдірді. Білім беру ісінің үздігі, ардагер ұстаз Гүлжан Момбекова мен аудандық аурухана дәрігерінің орынбасары Гүлжанат Аққозиева және музей директоры Ниязәлі Дүйсенбек жүрек жарды тілектерін жеткізді. Мерекелік жиында әсем ән шырқалып, көпшілікке мерекелік көңіл күй сыйланды.

Нұрсұлтан ҚАНАТҰЛЫ.

АНАЛАРҒА АҚ ДАСТАРХАН ЖАЙЫЛДЫ

Аудан әкімдігі 8-Наурыз халықаралық әйелдер күні мерекесіне орай, аналарға арнап мерекелік дастархан жайды. Ауыл, кент округтерден қоғамдық жұмыстарда ерекше белсенділік танытып жүрген әйел азаматшалар, батыр аналар, қыз-келіншектер мерекелік дастархан қонағы болды.

- Тәуелсіз еліміздің дамуы жолында аяулы қарындас-тар мен ардақты аналар еселі еңбек етіп жүр. Қазақ әйелдерінің белсенділігі

лихат хатшысы Бегімбет Байғараев, Шолаққорған ауыл округі ардагерлер кеңесінің төрағасы Бүркіт Арынбеков құттықтау сөз сөйледі. Аудандық «Әжелер» алқасының төрайымы, ауданның «Құрметті азаматы» Мәруа Қайыржанова мен Гүлсара Әлімбекова жылы лебіздерін арнады. Мерекелік дастархан басында аналарға ақ орамал жауып, гүл шоқтары мен сый-сияпат табыс етілді.

Қазіргі таңда аудан бой-



уақыт өткен сайын артып, экономикада, мәдениет пен саясатта қажырлы істерімен танылып, қоғамның қозғаушы күші болып келеді. Қашанда ер азаматтарға жігер, жасампаздық сыйлап жүрсіздер. Баршаңызға зор денсаулық, ұзақ өмір, бақ-береке тілеймін,-деді аудан әкімі Мұхит Тұрысбеков.

Сондай-ақ, аудандық мәс-

ынша 1018 «Алтын алқа», 1140 «Күміс алқа» белгілерімен марапатталған аналар бар. Жалпы, көп балалы аналар саны 2148-ді құрап отыр. Оларға мерейлі мерекеге орай, құрмет көрсетілді.

Аудан әкімінің баспасөз қызметі.

Сүгір мұрасына тағзым!



Қайран біздің бабалар-ай боз даладан сыр тартқан,
Сол сырлардан таңғажайып күй тасқындап, жыр аққан.
Жанды тербеп тарихымен күмбірлесе "Бес жорға",
"Телқоңырмен" тербелесің үні кетпей құлақтан!

"Боз інгеннің" бүлкілімен боз даласын шарлаған,
"Шалқымасы" шабыт берген күй құдірет ЖАНБАБАМ.
Сенің селдей сезіміңнен нотасыз-ақ

күй туып,
Адам бар ма "Қаратаудың шертпесіне" қанбаған?!

"Қосбасар" күй қоңырауласа сәби біткен уанар,
"Тоғыз тарау" тебіренсе ұрпағың бар қуанар,
"Кертөлғауға" ілесіп көр, жолың болсын Жас талап,
"Ыңғай төкпе" шертілгенде кәрі-жасың құп алар!

"АҚҚУ" (күй) ұшса сағым дала-айдың көлге теңелер,
Көңіл шалқып, санаң сергіп, рахатқа жаның бөленер!
Мыңжылқыдай маңғаз таудан "Мыңжылқы" күй шалқыса,
Туған өлкем күймен бірге тебірене жөнелер!

ҰЛЫЛАРДЫҢ аты өлмейді шәкірттер бар артында,
Кел жас ұрпақ, өрге өрле, күйге құмарт тартынба.
Күй өлмейді, күй өрлейді ұлы ҚАЗАҚ тұрғанда,
Мол мұрадан сусындай біл сарқылмас БҰЛАҚ ҚАЛПЫНДА

Нұрмаханбет СМАҒҰЛҰЛЫ,
Ыбырай ауылы.

Тіл мұңы

(Монолог)

Күз келгенде жерге түсер жұмыр шық
Халқым мені жырға қосар бір ыршып
Санғасырдың інжулерін жеткізіп,
Өртеңге де өніп келем тымырсық.

Өзегі ем фақиртердің рух алатын,
Өзені ем би-шешеннің уыт алатын.
Фараби, Абай, Ыбырай, Шоқанымның
Сәулесі ем бар әлемге нұр шашатын.

Мен туралы өлең көп асқақтаған

Мен туралы ой да көп сыр ақтарған.
Тағдырдың талқысында талай қандас
Сағынышын жолдады жырақтардан.

Қайыстай қара өлең боп иленемін,
Сахнада тоты құстай түрленемін.
Толқыным жетпей жатса жағасына
Күй болып домбырада күңіренемін.

Мәжнүнді Ләйлі қызға сүйікті еттім
Серттен тайған Қарабайды



күйікті еттім.

Періштедей ұшып жеттім иығына
Қара қылды қақ жарған Қазыбектің.

Жауын алып жарнамалар жанарымның
Өзге тіл бүйірін тәсті-ау қанарымның-
Мәңгілік ел боламыз! - деп ұрандаған
Жиреншелер, ашымайды-ау жандарың шын!

«ҚОЙАН» деп дұрыс жазған бүлдіршінге
Я-ны неге қоймадың деп ұрысады-ау,
«ҚОЙУ» деген уыз жүректі адастырып,
Білмейсің деп Ю-ды ұстаз тырысады-ау.

Тұқыртып қаңтарылған тұлпардайын
Тыпыршымын сусаған сұңқардайын.
Ызадан кейде қалам жарылардай
Кеудемде бір қыжылым қайнағандай!

Өз халқым өз ақысын өз тілінде
Ала алмаса не керек жалған мақтан?
Бал емес, у жалаймын бармағымнан-
Алыпқа айналамын қашан уақтан?

Бабаң тілі менмін го! әлмисақтан
Өз-өзіңді қорлаудан, ұлтым, сақтан!
Өзге тілдің бәрін біл, өзіңдікі-
Ту болып желбіресін шаңырақтан!

Тегеріште, сәні кірсін көрегімді,
Айналдырып дөдәгеле үзігімді!
Ахмет құрған осы отау биіктесе-
Биіктемек ардайым мәртебем де!

Шындықтың басы күн де, етегі мұз
Бүгінде табанымнан өтеді сыз.
Дұрыс оқы, дұрыс жаз, дұрыс сөйле-
Сенем саған иманды ұл, жетелі қыз!

Бибіқадияша МАУЛЕНҚЫЗЫ,
С.Бақбергенов атындағы шжжм мұғалімі.

Ахмет Байтұрсынұлына-150 жыл

ҰЛТ ҰСТАЗЫ



Ахмет Байтұрсынұлы 1872 жылы Торғай уезіне қарасты Тосын болысының 5- ауылында, Сарытүбек деген жерде дүниеге келген. Ахметтің әкесі қарапайым шаруа адамы. Байтұрсын Шошақов- арғын Үмбетей батырдың немересі. Әділетсіз өмірдің ұлы зары бала жүрегін он үшінде жарайлайды. Әкесі Байтұрсын мен оның інісі Ақтас қорлық, зорлыққа шыдамай, 1985 жылы 12 қазанда ояз бастығы полковник Яновлевтің басын жарып жіберді. Мұның соңы дүние мүлкіті тартып алумен, абақты, Сібірге он бес жылға жер аударылуымен тынады.

Табиғатынан аса дарынды туған талапты бала Ахмет 1982-84 жылдары әуелі көзі қарақты адамдардан өз үйінен хат таниды. Артынан жақын жердегі ауыл мектебінен сауат ашады. 1982-91 жылдары Торғай қаласында екі кластық орысша-қазақша училищеде, 1891-95 жылдары Орынбордағы мұғалімдік мектепте оқып, білім алады.

1885 жылдың 1 маусымынан бастап мұғалім болады. Өзі ізденіп, кітаптар оқиды, әдебиетпен айналысады оқулықтар жазады, аударма жасайды, өлең-жыр тудырады. Ел ішінде жас, оқыған, еркін мінезді батыл ойшылдың беделі өсе бастайды. Полиция тыңшыларының жаласымен күйе жағылып 1909 жылдың 1 шілде күні Семей абақтысына алынып сотсыз, үкімсіз, 8 ай бойы азап қорлық көріп қиналады.

Анасына жазған хатында былай дейді:

Бара алмай өтірікші болдым әбден,
Семейдің түрмесінде отыр балаң.

Мал ұрлап, кісі өлтірген жазығым жоқ,

Үкімет қылған зорлыққа бар ма шараң?

Осы үзіндіден әділетсіздік, зорлық-зомбылық көрген Ахмет күйін көреміз.

Түрмеде бостандық жайлы өлеңдер жазды. Солардың алғашқы қарлығашы «Қырық мысал» кітабы болды. Осы кітаптан соң Ахаңның атағы жайылып, елдің шын қамқоры екендігіне көз жеткізгендей болды.

Ақыры Қазақстанда тұру құқығынан айырылған соң, айдау ретімен 1910 жылы

Орынбор қаласына келеді. Осы жылдары қазақ халқының ары, намысын жоқтап, екінші емшілік ұраны болған «Маса» есімді өлең кітабын жазып шығарды. Кітаптың «маса» атануының да себебі бар.

«Ұйқысын аз да болса бөлмес пе екен,

Қоймастан құлағыма ызыңдаса» деп, төңкеріске дейін қалың надандық ұйқысына шомған халқын оятпақшы болды. Екінші жағынан, халықтың «қанын сорғыш ұлықтар» мен патша үкіметінің жағымсыз образдары да осы ұғымға сиып тұрғандай.

Бүгінгі таңда «маса» жинағының біз үшін құнды жағы-одан «қырық мысалдағыдай» таза саяси үн, халық мұңын ғана естіп қоймаймыз, өз өміріне қатысты деректер дүниеге көзқарасы, арман мақсаты айқын көрінеді. «Маса» жинағында теңсіздік, озбырлық, әділетсіздік, надандық жайлы айтылады. Мектепте бала оқытып жүріп «Әліпби» құралының кемшіліктерін көрді. Ахаң ауыл балаларының сауатын ашу үшін 1912 жылы Орынборда «Әліппе» бастырып шығарды.

«Әліппе» аса қызықты, баланы өздігінен білуге, үйренуге ымылдыратын түрде жазылған. Ахмет Байтұрсынұлына өзі көшбасшы болған қазақ тілі біліміне ғана емес, күллі түркі әлемінде атақ-абырой әперген «Тіл құралы» атты кітабы болды.

«Дыбыс жүйесі» (фонетика), «Сөз жүйесі» (Морфология), «Сөйлем жүйесі» (Синтаксис) атты үш кітаптан құралған тұңғыш грамматикасында қазақ тілін ана тілінде алғаш рет ғылыми жүйеге түсірді.

Ахмет Байтұрсынұлының әдебиеттану ісіне қосқан үлесі аса мол. Ол 1923 жылы Москвада қазақтың эпостық жыры «Ер Сайынды» бастырып шығарды. «Ер Сайын» негізінен, ел қорғаушы батырдың жорықтарын, ерліктерін баяндайтын белгілі эпостық жыр.

1925 жылы осы баспа арқылы «23 жоқтау» жинағын бастырды. Қайғылы оқиғаларға байланысты шыққан жыр, елдің ержүрек батырлары, көпшілік үміт артқан адамдары, басшылары туралы айтылған.

А.Байтұрсынұлының «Әде-

биет танытқыш» кітабы 1920 жылы жарық көрді. Бұл әдебиеттің тарихы мен теориясы туралы қазақ тіліндегі тұңғыш көлемдегі еңбек. «Әдебиет танытқыш» еңбегіндегі ауыз және жазба әдебиеттің әлеуметтік, қоғамдық мән маңызын ашудан гөрі адамгершілік, эстетикалық, әсемдік әуенін талдауға бейімділік танытады. Қазақ музыкасы мен ән-күйі өнеріне де терең ой жіберген ғалым. Ол халық әндерін жақсы білді және оларды тамаша орындайды. Жақсы домбырашы болған А.Байтұрсынұлы қоршаған ортаға сын көзімен қарайды, көңілі толмайды. «Қазақ салты», «Қазақ қалпы», «Досыма хат», «Жиған терген», «Тілек батам», «Жауға түскен жан сөзі» «Бақ» сияқты өлеңдерінің мазмұны осыны танытады. Байтұрсынұлының Абайға арнаған негізгі еңбегі «Қазақтың бас ақыны». Бұл мақалада көптеген мәселелерге мән берілген. Абайдың әдебиет тарихындағы орнын анықтап, оны қазақтың бас ақыны деп көрсетеді.

Ахмет-ғалым, тілші, түрколог, әдебиетші, ақын, публицист, аудармашы, мемлекет қайраткері. Республика оқу комиссары, Бүкілодақтық Орталық Атқару Комитетінің мүшесі, Қазақстан Академиялық Орталығының жетекшісі, Ташкент, Алматы жоғарғы оқу орындарында профессор болады, сөйтіп жаңа заман үшін күреске түседі.

Адамгершілік нормалар бұзылып, сталинизм қылышынан қан тамған кезде Байтұрсынұлы әуелі 1929 жылы ұсталып, абақтыға қамалады, лагерь тепкісінде ұзақ азап көріп, 1936 жылы қайтып келеді, бірақ 1937 жылы тағы репрессияға ұшырап 1938 жылы атылады.

Ақаң ашқан қазақ мектебі, түрленген ана тілі, әдебиеттегі орны, «Қырық мысал», «Маса», «Қазақ» газетінің 1916 жылдағы қан жылаған қазақ баласына істеген еңбегі, өнер-білім, саясат жолындағы қажымас қайратын біз ұмытсақ та, тарих ұмытпайтын істер болатын.

Рамазан ТӨРЕКЕЛДІҰЛЫ,
Т.Әлімқұлов атындағы
№14 интернат-лицейінің
8 х/б сынып оқушысы.

